

AKASHVANI AIZAWL
REGIONAL NEWS UNIT

CM

Chief Minister Pu Lalduhoma’n nimin khan Arunachal Pradesh Minister of Agriculture & Allied Department Pu Gabriel D. Wangsu-in a sawm angin Ziro Valley Resorts, Subansiri District, Arunachal Pradesh a tlawh.

Chief Minister hi Pu Hage Appa, Ziro bialtu MLA leh district officials ten an lo dawngsawng a, Ziro Valley hmun hrang hranga sorkar hmalaknate enpuiin Chief Minister hi Pu Gabriel D. Wangsu in a tawiawm a ni.

Chief Minister hian Aqua Park Tarin, Naara Aba Winery, Siikhe Dil kianga Kiwi hmun leh Seeh Lake te bakah sorkar hmunhma dangte tlawhin an hmalakna hrang hrangte a sawipui a ni.



PWD MINISTER

PWD Minister Pu Vanlalhlana’n tukin khan Vaivakawn Cultural Centre-ah Vaivakawn Traffic tawt tihziaawm nana PWD ruahmanna sawi hona hun a hmanpui.

PWD Minister chuan lirthei pung zel avangin Vaivakawn Traffic junction-ah Traffic jam avangin lirthei khalhtuten hun tam tak an khawhral phah thin thu a sawi a. Traffic jam avanga he kawng pawimawh tak zawhtute harsatna sutkian a nih theih nan khawtlang hruaitute rawn chung a ruahmanna siam thuai a tul thu sawiin khawtlang leh ram tih hmasawanna tura Aizawl West Joint YMA hruaitute inhawanna chu lawmawm a tih thu a sawi.

He huna tarlan danin, Vaivakawn Traffic Junction helna tur ruahmanna kalpui theih a nih chuan, Vaivakawn Field sir zawhin, Vaivakawn Bazar Building leh Vaivakawn Bus Stand chhak, Dawrpui Vengthar panna kawng inkarah lei metre 75- a thui dawh kai tur a ni a. Lei dawh tur hian Vaivakawn Field huam chhungah ban awm lo tur leh lei chu Field hmangtute tan hnawk pha lo tura siam a tul thu tarlan a ni bawk.



GAS CONNECTION

Mizoram chakkhai lakluhna kawngpui chhia in a nghawng vangin Gas agency hrang hrang ten Gas Connection thar pek chhuah kawngah harsatna an tawk.

Vawiin khan kan palai chuan Gas Agency te a kawm kual a, gas connection thar chu la thei mah se, bur (cylinder) a lo thlen zung zung theih loh avangin harsatna awm mek a. Chanmari a awm Biakkungi Gas Agency chuan connection thar an pe chhuak thei rih lo a, a bur a then that rualin connection pawh tha taka pek chhuah zui theih an inbeisei tih an sawi.

Bawngkawna awm V Neihkunga Agency chuan Gas Connection hi an pe chhuak mahse an duh angin a bur an hmuh theih mai bik loh avangin connection thar nei tur chuan rei tak tak an nghah tih a ngai tih an sawi a, agency neitu Pu Lalzawmliana chuan, gas chu bungraw dang nen a inang lo a, a hman ruah hun nghah zel ngai a nih avangin a buaipui dan a danglam deuh niin a sawi a, connection thar diltute chu an dil hmasak dan indawtin muangchangin an pe chhuak tih sawiin, kum dangah pawh kawngchhia vangin harsatna an tawk thin tho a, kuminah erawh an tuar na zual niin a sawi.

(Byte : Pu Lalzawmliana)

Gas Agency te hian connection thar pek chhuah kawngah harsatna tawk mah se, a bur thleng hmasa apiang an pe chhuak zel a, Aizawl Municipal Corporation (AMC) chhungah chuan home delivery an kalpui mek bawk a ni.



CORRIGENDUM OF TEACHER’S DAY MESSAGE

Education Department chuan vawiin khan thuchhuah siamin Zirtirtute Ni puala Education Minister Dr Vanlalhlana thuchah tur an siamah kumina National Award to Teachers dawng awmlo anga sawi chu an tihsual palh anih thu an sawi.

Education Department hian vawiin khan an thuchhuah ah ramchhunga hmarchhak bial atanga dawng hmasa ber an lo hmai chu pawl antih thu an sawi a, Mizoram University atanga National Award to Teacher for Higher Education 2025 dawngtu Head of Mizoram Department Associate Professor Dr. Zoramdinthara chu an lawmpui takzet tih an sawi a ni.

Education Department chuan Education Minister in Teacher’s Day thuchah a sawi tur an siam laiin hmai palh ani an ti a, Mizoram sorkâr School Education Department thuneihnain a huam zirtirtu, National Award to Teachers 2025 dawng thei tura rawtte chungchâng chauh târlan a ni a. Mizoram atanga an recommend pathumin an dawnglo tih an sawi bawk.



NATURAL FARMING

National Mission on Natural Farming chungchanga Training, KVK Chawnhu, Lawngtlai-a neih chu tuang taka zawh fel a ni.

Tun thla September ni 1 atang ni 5 chhung awh training ah hian Sawrkar laipui Programme pawimawh tak National Mission on Natural farming chungchang zirtirna leh inhrilhfiahna hun hman a ni a, Loneitute tana hman tangkai theih tur sorkarin scheme pawimawh tak a rawn kalpui chungchang sawi niin loneituten hma an sawnna tur hrang hrang zirtir an ni.

Training a telte hi he scheme in a huam, Cluster 10 atanga thlan bik mi 20 te an ni a, Natural farming awmzia leh pawimawhna sawi niin huan thlai siam kawnga hmasawnna tur hrang hrang leh tharchhuah a pun theihna tur inzirtir a ni bawk.

